

REGIONAL NEWS

HEADLINES:-

1. Chief Minister Pu Lalduhoma chuan Darlawna khua a kangmei chhuak chu pawia tih thu a sawi a, a rem angin tanpuina pek an ni ang a ti.
2. Commerce & Industries Minister Pu F. Rodinglana hova meeting chuan dan lova industries ram luahte leh allotment hman dik lo te chu rang taka chhuah tir turin chak leh zuala hmalak ni se an ti.
3. Parliament Budget Session tuang taka neih anih theih nan sorkarin naktukah party hrang hrang thutkhawm a ko.
4. Bangladesh ramchhung buaina avangin India mi zirlai 700 chuang, India-ah an rawn haw tawh.

<><><>

CHIEF MINISTER

Chief Minister Pu Lalduhoma chuan Darlawna khua a kangmei chhuak chu pawia tih thu a sawi a, a rem angin tanpuina pek an nih tur thu social media kaltlangin a tarlang bawk.

Nizan dar 11:50 vel khan Darlawn Lungverhkawnah kang mei chhuakin In luah lai Assam Type pahnih leh Concrete builing pahnih chu a kang a. Kangmei chhuak vang hian mihring thi leh hliam an awm lo hlauh a, zing lam dar 1:40 velah thelh mih a ni.

Pu Lalduhoma chuan vawiin khan Instagram kaltlangin he thilthleng pawia tih thu hi a sawi a, chhiat tawkte hi SDRF atangin tanpuina awm thei ang te pek an ni ang, a ti. CM hian chhiat tawk tanpuitu Darlawn VC, YMA leh mi tlawmngaite chet dan chu a chhuangin an chungah lawmthu a sawi bawk.

Darlawn khawtlang hruaitute sawi dan chuan In kang hi Pu Zadailova In, Assam Type, a hnuai lam mi pakhat luahlai atanga intan nia hriat a ni a, a kan chhuahna inluah tu hi a riahchhuah zan a nih avangin current kal sual vanga kangmei rawn chhuakah an ngai a ni.

Vanduaina thlenna hmun Darlawn Lungverhkawn hi Darlawn khaw chung laili laia awm a ni a, In sak pawh a inhnaih hlawn avangin kangmei chhuak hian a man chak hle niin a hriat. Vawiin hian kangmei chhuak bungraw senghawi in Darlawn khawtlang an hnattlang a ni.

<><><>

LAWNGTLAI DC

Lawngtlai DC, Cheemala Siva Gopal Reddy-a chuan Zorinpui tlawhin, Zorinpui atanga Paletwa kawngpui laih hna thawktu IRCON International Ltd. hmalakna leh hnathawhte a enfiah.

Pu Cheemala Siva Gopal Reddy chuan Kaladan Multi Modal Transit Transport Project-in Mizoram tana hmasawna rahbi thar a thlen tur chu a taka hmuh a chakawm tawh hle a ti a. He kawngpui zawhfel a nih chuan sumdawna lian zawk kalpui niin, Lawngtlai bakah Mizoram hmun hrang hranga chengte tan hmathamna tam tak a thlen dawn, chungkaw tam tak tan eizawna tha tak a siam dawn a ni, a ti. Hmasawna tuantling awm tur leh KMMTTP hlawn tak tak tel turin a ram leilungfaten tun atanga rilru siam fel a tul hle a, chutiang lam hawia inbuatsaih a ngai a ni, a ti.

Lawngtlai DC chuan hmasawna hnathawh tam tak a hun takah zawh a ni lo fo tih tarlangin hei hi a pawia hle a, a hun taka zo turin 'contractor' te an pawimawh hle rualin mipuite pawhin harsatna siam lo a, tha taka hna an thawh theihna tura kan thurualpui thiam a tul hle a ti. KMMTTP zawhfel a nih chuan Lawngtlai chu 'Dry port' tha tak a ni tawh dawn tiin Lawngtlai mipuite harsatna siamtu ni lo a, hnathawktute tanpuitu ni zel turin a sawm a ni.

Zorinpui atanga Paletwa inkar kawngpui hi 'Two Lane' tur niin, kum 2022 July ni 7 khan IRCON International Ltd chuan hna an tan a, kum 2026 January ni 6-ah zawhfel tura ruahman a ni a. Kawngpui km109.2 a thui bakah hian Culvert, Major & Minor Bridges, Bus Bay & Bus Shelter leh Truck Lay Bye- te siam a ni dawn bawk.

COMMERCE & INDUSTRIES MINISTER

Commerce & Industries Minister Pu F. Rodingliana hoin nimin khan Industries ram thubuai chingfel tura hmalakna kal mek chak zawka kalpui dan tur ngaihtuahin Commerce & Industries Department leh Revenue Department official te leh DC Aizawl te an thukhawm.

Minister Pisa-a thutkhawmah hian Industries department ram dan lova luahtute leh industry dinna tura allotment pek tawh, allotment pek an nih anga hmang lote chhuah tir emaw an allotment cancel tura hmalakna kal mek, hmalak tawhna chin thlirletna leh chak zawka tihhlawhtlin dan turte rel a ni a.

He Joint Meeting hian Industries ram huam chungga dan lova awmte leh allotment anga hma la lo te chu insasengna hun pek ni se, hun tiam ral rualin Joint Task Force din ten a hmunah kalchilhin thupek zawmlote zawnchhuahna neih ni se tiin a rel a ni.

Meeting hian document leh pass pe chhuak theitu dik tak in a pekchhuah ni lo hmanga industries ram lo luahte leh allotment hmang dik lo te chu rang taka chhuahtir turin chak lehzuala hmalak zel a rel a. Mi thenkhat industries ram zuar an awm thu leh heng ram te hi lo leisak lo turin mipuite chu fimkhur turin a chah thu meeting thuchhuak hian a tarlang bawk a ni. Industrial Growth Centre (IGC), Luangmual ram chingfel chu hmalakna hmasaa neih tur a nih thu leh a dang pawh rang taka hmalak chhoh zel anih tur thu rel a ni.

<><><>

MNYF

MNF Thalai Hqrs chuan mithahnem ngaite PIL avanga High Court in dan lova kuhva ro tawlh chungchang CBI chhui tura a dah ta chu High Court in Mizoram sorkar a rin zawhloh zia a tilang a, High court thutlukna chu lawmawm an ti tih vawiin khan siamin an sawi.

MNYF Vice President Pu Lalnunmawia Pautu chuan Kuhva ro bag 2000 hmuh chhuah thar leh Vairengte Godown a kuhva bo bang Bag 3786 chu bo tawh lo se MNYF chuan an duh tih a sawi a, ZPM sorkar hnuai a kuhva man tawh sa tam tham tak a bo chuan ZPM thuneitute an inrawlh a rinhlelhawm hle an ti a, Myanmar atanga kuhva rawn lut avang hian Mizorama kuhva chingtute harsatna nasa tak a thleng a. Sorkarin thla 1 chhungin kuhva ro tawlh nuai reh an tum thu an sawi laiin a hluar zawk emaw tih tur khawpin kuhva tawlh a nasa a. Chuti karah Kuhva rah man bag 5700 chuang lai mai a bo zui leh mai chuan ngaihtuahna a tithui nasa hle a a ni, a ti. Bilkhawthlir kuhva chingtu Co-operative Society Chairman chuan Vairengte leh a chhehvelah khuan Kudam khu awm lo se, thiat vek se tiin, Chutiang tur chuan kan Sorkar hian hma la sela, hmasawna a awm ngei ang a ti bawk.

Vawiin khan MNYF Hqrs hruaitute chuan Bilkhawthlir kuhva chingtute duty post-te, tunhnaia Phaisen venglaia dan lova kuhva rah tawlhruk chheprelh an man chhuahna hmunte, thuneitute'n kuhva rah an man sa bag 5849 bona Vairengte kudam te chu a hmunah an tawh a. MNF Thalaite chuan Vairengte IOC veng kuhva Bag 2000 chuang awmna Godown hmuhchhuah tharte an tawh nghal bawk.

<><><>

CM & SPORTS MINSITER

India rama football thuneitu sang ber All India Football Federation (AIFF) chuan Lallianzuala Chhangte chu Player of the Year 2023-2024 season atan a puang a. Mizo tlangvalin chawimawina a dawng hi Chief Minsiter Pu Lalduhoma leh Sports Minister Pu Lalnghinglova Hmar te chuan an lawmpui thu an sawi.

Indian Super League (ISL) season hmasaah khan Lallianzuala Chhangte hian Mumbai City FC chu a champion pui a, mimal chawimawina sang hi a vawi hnih dawna a ni a, nikum khan a lo dawng tawh bawk a ni. Lz-a Chhangte bakah hian David Lalhlansanga chu player chhuak thar tha Promising Player of the Year atan thlan a ni bawk. Lalhlansanga hian Mohammedan Sporting chu Calcutta Football League leh I-League-ah a champion pui ve thung.

Pu Lalduhoma chuan, Mizo hnam te chu hriat theih chinah pi leh pu te atanga hnam huaisen leh taima an ni a, ti a. Lallianzuala Chhangte leh David Lalhlansanga ten India ram pumpui Football-ah chawimawina nopui an dawm chuan Mizo hnam nihna

dik tak a tarlang niin a sawi a, Mizo tlangval te pahnih chuan Mizo hnam an chawimawiin hnam damna thlentu Pathian an chawimawi tel bawk a ni, a ti.

Sports Minister Lalnghinglova Hmar chuan Indian football-a mi pawimawhte, Union Sports Minister leh Indian Sports hotu rualte hmaa Mizo tlangval lawmman dawn thu an puang chu ngaihthlak a nuam takzet a ti a. All India Football Federation-in Best Men's Player-a an thlan Lallianzuala Chhangte leh Promising Player of the Year-a an thlan David Lalhlansanga-te thinlung takin a lawmpui tih a sawi.

<><><>

ALL PARTY MEETING

Parliament Budget Session tan hma naktuk hian party tin thutkhawm, sorkarin kovin Parliament inkhawm, tluang taka neih theih dan tur a sawipui dawn a ni. Parliament Budget Session hi karleh Thawhtanni-ah tan a ni dawn a, thawhlejni-ah Union Finance Minister, Nirmala Sitharaman-in kum 2024-2025 atana Union Budget a pharh ang.

<><><>

MBBS STUDENT SUSPENDED

NEET-UG exam zawhna putru chhuina kal zelah Rajendra Institute of Medical Science, Ranchi-a MBBS kum hnihna zirlai, Surabhi Kumari chu suspend a ni a, Surabhi hi hostel atangin nimin khan CBI-in an man a ni.

Thu an zawhfiahnaah Surabhi Kumari hian NEET exam zawhna chhan sa a neih thu a puang a, amah hi Jharkhand-a Ramgarh Dist mi a ni.

<><><>

BANGLADESH VIOLENCE

Sorkar hnaa quota siam duh loh entir nana Bangladesh ramchhunga tualchhung buaina chhuakah mi 104 an thi tawh a, hliam, 2500 chuang an awm tawh bawk.

Buaina chhuak vang hian Bangladesh-a India mi zirlai 700 chuang, India-ah an lo haw tawh a, heng zirlaite hi Uttar Pradesh, Haryana, Meghalaya leh Jammu & Kashmir mite an ni ber a, a remchan dan ang angin an lo haw a ni.

Buaina hi thla hmasa atanga chhuak tan a ni a, Thawhtanni kaltaa Dhaka University-a zirlaite inkara buaina chhuak atangin boruak a so sang chho leh a, university zawng zawng khar anih bakah internet service-te pawh tih tawp ti tih a ni.

Bangladesh-in zalenna a hmuh hnu khan sorkar hna zaa 30 chu zalenna sualtute tan hauh a ni a, kum 1997-ah sorkar chuan he quota hi zalenna sualtu fate pawh huam tirin kum 2010-ah zalenna sualtu tu-te thlengin huam tir a ni. Hna hauh duhloh entir nana kum 2018-ah ram puma nawrhna huaihawt anih hnuah sorkar chuan first class leh second class hna hauh sakna chu a hlip a, hemi kuma sorkar thuchhuah hi High Court chuan dan kalh a ni tiin thla hmasa ni 5 khan thu tlukna a siam a, heta tang hian buaina hi a intan a ni.

<><><>